

VOIO BALLAR EL HIP-HOP

El saloto de casa xe el mio palco. Sposto tuto e me fazo posto. Qua imparo mia sorela a balar. Non ghe imparo la polka, el valzer, la mazurca e el baletto clasico. Mi ghe imparo el hip-hop con coreografia.

I genitori, se sa, ga dei sogni per i propri fioi. Se trata de sogni che gaveva lori de pici e no ga rivà realizar. De quando son nata mio pare el pregava e sperava che sonasi un strumento. Ma no un strumento qualsiasi: voleva che imparasi sonar un strumento de l'Istria, uno che se usa per le feste, le fiere, le noze, e che porta tanta alegria. Qual podaria eser? La fisarmonica triestina, naturalmente.

Cussì all'età de due ani, Babbo Natale me ga portado la mia prima fisarmonica. La sonavo per giogo e a mio pare ghe piaxeve, iera proprio orgoglioso. Ma dopo un poco me son stancada. No me andava proprio de giogar con quel strumento. Per le mie man xe passà el xilofono, la tromba, el flauto... A cinque ani el mio caro Babbo Natale me ga portado la batteria completa, quela de veri profesionisti. Mezz'ora de interesse xe come dir una busia. Dixemo che gavevo mezz'ora de interesse in tutto.

El mio caro papà no se ga areso. Cussì me ga iscrito a scola de musica. Dopo un ano de preparazion e la vision e prova de tuti i strumenti, me son decisa che sonarò el pianoforte. Mio pare iera contento. In parte el suo sogno se realizava. "Chi sona el piano, sa sonar anche la fisarmonica" dixeva. La regola però iera: dovevo sonar con felicità e impegno regolare, ma soprattutto senza farse pregar per far esercizio. All'inizio no gavevo capì. Me pareva un giogo facile.

Da quando son nata me sento contar che i mii prozii sonava la fisarmonica e mio bisnono materno cantava come un usignol. Me ricordo mio bisnono paterno, nono Mario, che per ogni compleano tirava fora la sua fisarmonica quando se doveva cantar "Tanti auguri". Tuti autodidati con un grande amor per la musica. Mi go la fortuna de poder andar a scola de musica e imparar per ben. Questo continua a ripeter mio pare. Ma perché no la sona lui 'sta fisarmonica? Tropo stonado, diria.

Mi el pianoforte lo sono, ma senza seguir la regola. Solo se no bisognasi fadigar tanto...

E allora sposto de novo tuto in saloto, metemo la musica forte e mi e mia sorela balemo e me sfogo perché me piaxi. Ecco, cosa voio! Mi voio balar el hip-hop.

E se mio pare vol realizar el suo sogno con una fia. Ga ancora due a casa, le mie sorele minori.